

des Wassers einen Topff voll / seud das ein / daß sich ein Schlamm darinnen sezt / den wieg eyn vnd thue ihm ferner / wie einem andern Silber Erz / so findestu was es helt.

## Wie man ein recht Bleykorn / das man in der Prob pflegt abziehen / machen sol.

**I**nem jeglichen Probirer ist von nöten / daß er des Bleykorns gut acht hab / vnd von dem Bley / davon er täglich Probirt / mehr als ein Bleykorn mache / damit er des gewiß sey / daß es hat fast alles Bley Silber bey sich / Vnd ob wol das Villacher Bley dafür gehalten wirt / als sey es das beste vnd reineste / das zum Probirn wol dient / wie es dann auch ist / so findet man doch wenig darunder / das gar ohne Silber wer.

Villacher  
Bley ist nit  
one Silber.

So ist auch nichts darauff zu gründen / daß etliche vngelübte Probirer / von dem Probirbley nur 4. Centen auff der Sappeln abgehen lassen / vnd so sie kein Silber darinnen finden / meynen daß darumb das Bley nichts halten solle / Sondern man sol so viel Bley auff eine gute Sappeln sezen vnd abgehen lassen / so viel man zu einer jeden Prob braucht / vnd derselben mehr dan eine schweren abgehen lassen / Wo alsdanu in diesen allen nichts gefunden wirt / dann mag man vrtheilen das Bley halt kein Silber / vnd ist dennoch auch nicht gar darauff zu trawen / Derhalben ein Probirer sein Bley offtmals widerumb probiren solle / damit / ob ein stück an einem ort / dem andern nicht gleich were (wie dann der Bleystück keines auff einmal in der Hütten da mans macht / gegossen wirt) daß er dennoch seines Bleykorns / daran dann viel gelegen / gewiß sein kan / Dann wirt sich befinden / daß auch das Villacher Bley / wann die ganze Bley schwer probirt wirt / ein Körnlein Silber hinder ihm auff der Sappeln lest / welches / wie obgemeld / wie klein es auch sey / zu dem Probir gewicht in die Bag gelegt / vnd von dem andern Korn / das vom probirn kommet / abgezogen werden solle.

Ferner haltens etliche Probirer dafür / wann man dem Bley ein wenig Kupffer / das gar kein Silber helt / zusezt / vnd auff der Sappeln abgehen lest / daß sich das Bleykorn desto besser finde / Das ist wol

Bleykorn  
mit zusatz  
Kupffers.